

Yemen was not Arab nor Hijaz

اليمن ما كان عربي. ألا للمتعصبين محوّرِي العلم، أو يلي هيك قنْعُون.

العرب شعب والحَضْرَمَوْتِيّين شعب والسَبْئِيّين شعب والمَعِينِيّين شعب والقَتَبَانِيّين شعب والجَمِيرِيّين شعب. آخر ٥ كانوا باليمن الحالي. أما العرب فكانوا قبائل غرب الفرات نزولاً حتى نجد. ينفصل بينن وبين اليمن الربع الخالي.

سمّى الرومان شبه الجزيرة بالعربية بسبب وصولن لشمال الجزيرة عند العرب. وإذا سمي الغرب خط المُسند (خط منطقة اليمن) بال South Arabian script،

وترجمه المسلمون العرب في القرن العشرين الى "الخط العربي الجنوبي"،

فخال لهم إنو الخط هو عربي وبالتالي إنو شعوب اليمن كانت عربية قبل الإسلام. أكيد مع خبرية وهروب "العرب" من اليمن وانتشارن بأرجاء المعمورة (بعد انهيار سدّ مأرب)... العلم صار بيعرف إنو العروبة خلقت ببادية الشام شرق كنعان، مش باليمن.

ومنعرف نقش ظفار يلي مكتوب في: "ليس عندنا عرب" (إقرأ المرجع ياقوت الحموي، معجم البلدان، ٦٠/٤، مادة "أظفار").

حتى الحجاز ما كان عربي وباعتراف الاستنباط المسلم يلي بصنّف القبائل تبع "اليمن" بـ "العرب الاقحاح" (القحطانية) و(غالبية) تبع الحجاز بالمُسْتَعَرَبَة (أي اساساً غير العربية، اي العدنانية) ومنها قبيلة قريش، وعلمياً منعرف إنو كان في ثلاث شعوب بالحجاز: القيداريون والثاموديون والدادانيون / اللّحيانيون. وعكس ما رح تقرؤا بكتير محلات، ما كانوا عرب، وما كان في عرب بالحجاز.

يلي صار إنو بالقرن السادس فانت اللغة العربية، ولو بخجل، عالحجاز عبر التجارة مع التتوخيين يلي هني بالأصل قبائل عربية استقرت ببادية الشام، وهني يلي وضعوا العربية الفصحى والحرف العربي صوب سنة ٤٠٠ ميلادي بناءً على لغتن المحكية العربية، وبلّشت اللغة العربية تحل مطرح السريانية عندن (عند التتوخيين) وبالحجاز كتابةً (مش محكية). (وأكيد انتشر استعمال اللغة العربية بعدان مع الإسلام).

ومنعرف العادة السيئة يلي هي تسمية الشعوب حسب اللغة المكتوبة عندن.

فبالنتيجة أكيد تعودنا ع تعابير مثل: القيداريون العرب، الكنعانيون العرب، العرب الثموديون، إنو هيك منحنط كلمة "عرب" وين ما كان.

كل شعب يستحق الاحترام انما سرقة الهويات حرام.

وجود احرف طاء وقاف وضاد (نعم حتى الضاض) والذال... ما بيعمل من يلي عميحي حكماً عربي.

الخريطة أدناه بتفرجي نطاق العرب. هو نطاق واسع، مع العلم إنو النص التحتاني كل عمرو فاضي، هو "الربع الخالي"، والنص فوقاني هو صحرا بتجول فيه قبائل، وصار بفترا ملحق بمملكتين أسسوها التتوخيين يلي انقسموا لقسمين (اللخميون / المناذرة، والغساسنة)، يلي كانوا مسيحيين قبل دخول المسلمين.

أكيد منذكّر إنو في حين بقي حينها أقل من ١٠٪ من الأقباط والسريان والأراميين والأشوريين والفرس والأنباط (الفلسطينيين والأردنيين تبع غرب الأردن) (ويمكن شي ٦٠ - ٧٠٪ من الكنعانيين) والباقي صار مسلم، بقي صفر

بالمية من العرب والتتوخييين والحجازيين وشعوب اليمن، فهالشعوب اختفت سوسيلولوجيًا / اتنيًا / قوميًا، ولكن بقيوا السكان بيولوجيًا، وصاروا مسلمين كلن. إذًا العرب والعروبة اختفوا لمن الإسلام احتلوهم.

مشان هيك كمال جنبلاط بقول "لم يكن مفرد "العروبة" موجود في القاموس العربي قبل النهضة العربية". يعني ما كان في مفهوم أمة عربية بس اللغة بقيت عبر الإسلام والمسلمين. ولهيك قال ميشال عفلق، يلي مات مسلم، "العروبة جسد روحه الإسلام".

طبعًا مثل كل باقي المسلمين (كل مسلم حسب قوميته السابقة للإسلام)، العرب يلي صاروا مسلمين احتفظوا بأمور "سوسيلولوجيًا سطحية وشكلية" من عروبتن (الجمال، الصقر، النمر، الصحراء، العكال، الكوفية، المنسف، اللغة...) مثل ما الإسلام يلي كانوا فرس وأقباط ومشرقيين وأتراك وأكراد وبربر - أمازيغ وويغور وغيرن محتفظين بأمور من حضاراتن السابقة (لبس وأكل وبعض العادات). ولهيك منقول "المسلمون الفرس" و"المسلمون الأتراك" متلاً. ولكن جوهر سيرورة حياتن (الاجتماعية والسياسية والوجدانية...) هو دنيا الإسلام أي الثقافة المسلمة، مش ثقافة الفرس والأتراك يلي ما قبل الإسلام. وهول ("المسلمون الفرس" و"المسلمون الأتراك" و"المسلمون العرب") تعابير الإسلام ما بيعترف فيها،

يعني المسلم الصالح ممنوع يقول "مسلم فارسي أو فارسي مسلم"، يقول "مسلم في فارس". أما ليش ما منقول بالمشرق تحديداً، "المسلمون الكنعانيون" أو "المسلمون الأشوريون" أو "المسلمون الأقباط أو السريان..."، فلأن الإسلام، كونه خلق هون، نجح بعقر دار مؤلدو بانو يمحي الذاكرة الجماعية ل يلي أسلموا ونجحت النهضة العربية باستبدال الاسم الإتنى وصاروا "المسلمون العرب". ولكن صرتوا هلق عارفين إنو "المسلمون العرب"، بمعنى "المسلمون يلي كانوا عرب"، هني سكان بلاد العرب يلي عالخریطة.

خريطة الشرق الأوسط ترجع لعام ١٩١٨

